

Minning



Ingibjörg Ragnheiður Magnúsdóttir, heiðursfélagi
Félags íslenskra hjúkrunarfræðinga, lést þann
20. janúar síðastliðinn. Með henni er genginn
atorkusamur brautryðjandi í hjúkrun á Íslandi.

Ingibjörg fæddist 23. júní 1923 á Akureyri. Hún tók kennarapróf frá Íþróttakennaraskóla Íslands og stundaði íþróttakennslu áður en hún settist í Hjúkrunarskóla Íslands þá 34 ára gömul og lauk þaðan prófi í maí 1961. Strax eftir útskriftina lá leið hennar aftur til Akureyrar þar sem hún tók við stöðu hjúkrunarforstjóra við Fjórðungssjúkrahúsið á Akureyri þann 1. júní 1961 sem hún sinnti í tíu ár. Veturinn 1964-1965 dvaldi hún í Danmörku og bætti við sig námi í hjúkrunarkennslu og spítalastjórn við Sygeplejeskolen í Árósum. Þar kynntist hún nýrri stétt sem kölluð var sygehjælpere og starfaði á sjúkrahúsum. Eftir heimkomuna hóf Ingibjörg baráttuna fyrir að sambærilegri menntun yrði komið á fót hér á landi og í framhaldinu tók hún það að sér. Fyrstu nemendurnir hér á landi hófu nám við Fjórðungssjúkrahúsið á Akureyri haustið 1965 undir handleiðslu Ingibjargar og um vorið 1966 útskrifaðist fyrsti hópurinn. Nefndi Ingibjörg þessa nýju stétt, sjúkraliða. Fimm árum síðar, eða árið 1971, var Sjúkraliðaskóli Íslands stofnaður.

Ingibjörg hafði alla tíð mikinn metnað fyrir hjúkrun og námi hjúkrunarfræðinga. Hún var einn ötulasti talsmaður þróunar hjúkrunarmenntunar á Íslandi og var ein þeirra sem barðist fyrir því að koma hjúkrunarfræðinámi í Háskóla Íslands. Þeirri baráttu lauk með stofnun námsbrautar í hjúkrunarfræði við Háskóla Íslands árið 1973. Var hún einn af brautryðjendum námsbrautarinnar og gegndi stöðu námsbrautarstjóra frá 1975-1990.

Það lýsir vel huga Ingibjargar til þróunar hjúkrunarfræðinnar og hjúkrunarfræðinga að hún hafði forgöngu að stofnun Rannsóknarsjóðs Ingibjargar R. Magnúsdóttur árið 2007. Tilgangur sjóðsins er að efla rannsóknir í hjúkrunarfræði og

ljósmóðurfræði. Styrkir eru veittir til hjúkrunarfræðinga og ljósmæðra í doktorsnámi vegna rannsóknarverkefna sem falla að markmiðum sjóðsins. Sjóðurinn heyrir undir styrktarsjóði Háskóla Íslands og hefur Ingibjörg styrkt sjóðinn í gegnum tíðina með rausnarlegum fjárframlögum.

Forystukonur innan hjúkrunarstéttarinnar lögðu lengi að stjórnvöldum að ráða hjúkrunarkonu til starfa í ráðuneyti heilbrigðismála. Sumarið 1971 var orðið við þeim tilmælum þegar Ingibjörg var ráðin í stöðu fulltrúa í nýstofnuðu ráðuneyti, heilbrigðis- og tryggingamálaráðuneytinu. Fljótlega var hún gerð að deildarstjóra, fyrst kvenna í slíkri stöðu innan Stjórnarráðsins, sem síðar breyttist í skrifstofustjóra. Ingibjörg starfaði þar í rúma tvo áratugi. Í störfum sínum í heilbrigðis- og tryggingamálaráðuneytinu beitti hún sér fyrir margvíslegum málum til að efla hjúkrunar- og heilbrigðisþjónustu í landinu. Má þar nefna áhrif á lagasetningar um Hjúkrunarráð, sjálfstæði hjúkrunarstéttarinnar og heilsugæslu og byggingu heilsugæslustöðva á landsvísi. Þá sat hún í stjórnnum ýmissa heilbrigðisstofnana, skóla, nefnda og ráða á sviði heilbrigðisþjónustunnar auk ritstarfa á því sviði.

Ingibjörgu var sýndur margvíslegur heiður fyrir störf sín á sviði hjúkrunar og heilbrigðismála. Hún var sæmd riddarakrossi hinnar íslensku fálkaorðu á nýársdag 1988 og verið heiðursfélagi frá 1989 í Félagi íslenskra hjúkrunarfræðinga.

Hjúkrunarfræðingar þakka Ingibjörgu R. Magnúsdóttur störf hennar í þágu hjúkrunarfræðinga og þróunar og eflingu hjúkrunarfræðinnar hér á landi. Blessuð sé minning hennar.